



## **NOTA DE PRENSA**

**Un total de 600 galegos maiores de 60 anos poderán beneficiarse ao longo deste ano de estadias de dez días en balnearios da comunidade a un prezo de entre 300 e 376 €**

**O 17 de abril remata o prazo para poder optar a unha destas prazas que ofrece o programa “Benestar en Balnearios” da Consellería de Política Social**

**Participan 14 balnearios galegos, 5 na provincia de Ourense, 4 en Pontevedra e Lugo e 1 na Coruña**

---

*Santiago de Compostela, 20 de marzo de 2017 (Vía Láctea Comunicación).*- A Consellería de Política Social ten en marcha unha nova edición do programa “Benestar en Balnearios”, no marco do cal se ofertan prazas para estadias e tratamentos en centros termais de toda a comunidade. Convócanse un total de 600 prazas para participar nesta iniciativa en diferentes quendas ao longo do ano. As solicitudes poderán presentarse ata o 17 de abril.

### **Requisitos para participar no programa**

Poden beneficiarse deste programa os maiores de 60 anos e tamén os maiores de 55 que reúnan a condición de pensionista polos conceptos de xubilación, invalidez, viuvez ou outras pensións. Os solicitantes deberán estar empadroados e residir nalgún Concello da comunidade galega. Terán que valerse por si mesmos para as actividades da vida diaria e estar en condicións de participar no programa. Non poderán padecer alteracións do comportamento que poidan afectar á normal convivencia nos establecementos, nin ningunha enfermidade transmisible con risco de contaxio. E carecer de contraindicación médica para recibir os tratamentos termais.

A persoa solicitante poderá ir acompañada do seu cónxuxe ou parella, sempre que cumpra os requisitos indicados, agás o relativo á idade. Tamén poderán participar, en calidade de acompañantes, os fillos dos solicitantes que teñan un grao de discapacidade igual ou superior ao 33 %, sempre e cando se poidan desprazar con autonomía e cumpran todos os requisitos citados agás o referente á idade.

### **Presentación de solicitudes**

Os interesados poden consultar toda a información sobre o programa “Benestar en Balnearios” na web <http://benestar.xunta.es/web/portal/portada>, para coñecer as indicacións terapéuticas de cada centro, as datas e quendas de cada un e os prezos que ofertan. As estadias son de dez días con diferentes quendas ao longo do ano. As tarifas, moi accesibles, varían en función do establecemento hoteleiro e das características de cada balneario, entre os 299,81 e os 376,46 €.

As solicitudes presentaranse preferiblemente por vía electrónica a través do formulario normalizado dispoñible na sede electrónica da Xunta de Galicia (<https://sede.xunta.gal>). Opcionalmente, poderanse presentar as solicitudes de xeito presencial en calquera rexistro da Xunta de Galicia ou nos municipais.

## Tratamentos termais con fins terapéuticos e actividades socioculturais

O programa inclúe aloxamento e manutención en réxime de pensión completa e en cuartos dobres de uso compartido. Ademais, os beneficiarios poderán someterse a tratamentos termais con fins terapéuticos, que comprenden: o recoñecemento médico ao ingresar no balneario para a correcta prescrición do tratamento, o tratamento que prescriba o facultativo do balneario, o seguimento médico do tratamento, xunto coa participación en actividades de animación sociocultural que se leven a cabo no establecemento termal.

## Participan 14 balnearios de toda Galicia

Nesta convocatoria participan un total de 14 balnearios de toda Galicia. Da provincia da Coruña o Balneario de Carballo. Da provincia lucense están o Balneario de Guitiriz, Augas Santas (Pantón), o Balneario de Lugo-Termas Romanas e Río Pambre (Palas de Rei). De Ourense participan os establecementos termais de Baños de Molgas, Arnoia Caldaria Hotel Balneario, Lais Caldaria Hotel Balneario (concello de Cenlle), Lobios Caldaria Hotel Balneario e o Gran Balneario do Carballiño. E en Pontevedra os balnearios de Baños da Brea (situado en Vila de Cruces), Caldelas de Tui, Termas de Cuntis e Balneario Acuña (en Caldas de Reis).

Dende a Asociación de Balnearios de Galicia valórase “moi positivamente que a Consellería de Política Social siga a apostar por este programa, de indubidables beneficios sociais e sanitarios para os nosos maiores, malia que non chegue ao número de prazas que ofertan outras comunidades nos seus programas autonómicos como Valencia (10.000 prazas), Castela A Mancha (3.000 prazas) ou Castela e León (2.000 prazas)”.

Os interesados poden informarse chamando ao teléfono **981 547 437** da Subdirección Xeral de Promoción da Autonomía Persoal e Prevención da Dependencia, así como nas Xefaturas Territoriais da Consellería de Política Social, nos Centros Sociocomunitarios de Benestar da Consellería, nos servizos sociais comunitarios dos concellos e nos servizos sociais de atención primaria e especializada de saúde. Tamén poden chamar ao Teléfono Social: **900 333 666**.

**PRENSA Asociación de Balnearios de Galicia**  
981 554 407 / 639 768 929 ..... [www.vialactea.es](http://www.vialactea.es)  
[www.balneariosdegalicia.gal](http://www.balneariosdegalicia.gal)